

Tematisar la sortida

La giuventetgna grischuna è envidada da s'exprimer davart ils giavischs per la sortida

DAD ANDREAS CADONAU

■ **La sessiun giuvenila grischuna ed il parlament da giuvenils da Cuira appelleschan a la giuventetgna grischuna da s'engaschar politicamain e da stipular ses giavischs davart la sortida. La giuventetgna sa far quai via la plattafurma www.gr.engage.ch a partir dals 29 da mars enfin ils 8 d'avrigl.**

Las meglieras ideas stipuladas sin la plattafurma lantschada aposta per l'acziun da tematisar la sortida da la giuventetgna grischuna vul la sessiun da giuventetgna grischuna far valair vers il chantun Grischun. La sessiun giuvenila grischuna ed il parlament giuvenil da Cuira èn da l'avis che la politica haja lieu lunsch davent da la giuventetgna. La communicaziun electronica existenta na tanschia betg per cuntanscher la giuventetgna. En ina communicaziun scrivon ils represchents dals dus parlaments da giuventetgna en il chantun Grischun ch'els giuvenils stoppian vegnir plidentats en lur mintgadi ed els stoppian era sentir da pudair muventar insatgè. La copresidenta da la sessiun da giuvenils *Manuela Fetz* ha plidentà en ina communicaziun la situaziun da sortida en la citad da Cuira. Tenor ses avis haja la giuventetgna fadia ch'els locas e las ustarias serrian gia ina ura suenter mesanotg en la citad veglia da Cuira. Quels scumonds sajan da disavantatg tant per ils manaschis d'ustaria e per las bars sco per ils giuvenils en sortida. Las leschas restrictivas e la mancanza da pusseivladads dad ir en sortida sajan problematicas per la giuventetgna grischuna. Entras la nova plattafurma e l'appel dad articular ils basegns ed ils problems da la



La giuventetgna grischuna è envidada d'articular ils giavischs da sortida.

MAD

giuventetgna en connex cun la sortida spera la sessiun da giuventetgna da pudair dar intgins impuls politics per meglierar la situaziun. L'acziun cuzza enfin ils 8 d'avrigl e silsuenter vegnan las propostas evaluadas e las ideas las pli persvadentas inoltradas al chantun Grischun ni ch'el las vegnan realisadas dals giuvenils sez. Il comite d'organisaziun da la sessiun da giuvenils sa cumpona da represchents da tuttas partidas politics e spera che la

giuventetgna grischuna sa partizipeschia a l'acziun.

La giuventetgna sursilvana sa drizza vers Laax

La sortida da la giuventetgna da la Foppa sa drizza almain durant l'enviern en direzziun da Laax. Quai ha il president da l'Uniun da giuventetgna da Castrisch, *Sandro Gantenbein*, explitgà e ditg da na forsa betg esser sin il pli nov stan essend

ch'el vivia dapi intgins onns a Turitg. Il manaschi da divertiment instradà per il publicum dal sport d'enviern plidentà era la giuventetgna da la regiun. Per positiv valitescha Sandro Gantenbein la purschida dal bus da notg che lubeschia cuntanscher ils lieus da divertiment e puspè turnar a chasa. Per main attractiv per la giuventetgna en la Foppa valitescha il president da l'Uniun da giuventetgna da Castrisch la purschida da la stad. La giuventetgna da

Castrisch per exempel sa drezzia bain vers Glion, la saja la purschida da divertiment per giuvenils betg exnum attractiva. Sa divertir a Cuira saja pli probabel per scolaras e scolar da la scola chantunala che derivan da la Surselva in tema. Sandro Gantenbein ha numnà, sper las restricziuns enconuschentas en la citad da Cuira, il problem da betg pudair turnar cun il traffic public a chasa suenter mesanotg en Surselva. Laud per il bus da notg en Surselva deriva era dal president da la Uniun tetgala da la giuventetgna da Mustèr, *Pauli Lozza*. Pertutgant la purschida da sortida a Mustèr avess el anc inqual giavisch. Essend che la Treglia haja midà sia purschida restia anc la Nangijala che possia satisfar als basegns da la giuventetgna. Ma era la giuventetgna da Mustèr sa drizzi principalmain durant l'enviern puncto sortida vers Laax, ha Pauli Lozza explitgà e quai pervia da la purschida attractiva a favur dals giuvenils.

Ils giuvenils en pronts da sa partizipar

Ils represchents da la sessiun giuvenila chantunala han instradà la nova plattafurma per animar la giuventetgna grischuna da far valair ils agens interess. Els han menziunà ina studia da la Scola auta da Cuira che preschenta in maletg dad ina giuventetgna interessada a dumondas politics e mintga terz dals interrogads hajan explitgà da vulair far diever d'ina plattafurma per exprimer ils giavischs. La sessiun dals giuvenils ed il parlament giuvenil da Cuira vulan plidentar la giuventetgna e s'engaschar per realisar las ideas. Che quai è senz'auter pussaivel mussa il bus da notg en Surselva ch'è vegnì lantschà avant passa in decenni da giuvnas e giuvenils politics da la regiun.